

**Muhyiddin Saran Umat Islam Perbaharui Azam Untuk Kejayaan
Bernama
14 November, 2012**

KUALA LUMPUR, 14 Nov (Bernama) -- Timbalan Perdana Menteri Tan Sri Muhyiddin Yassin Rabu menyarankan umat Islam di negara ini supaya bersama-sama memperbaharui azam untuk terus menempa kejayaan dan kemajuan sempena bermulanya tahun baru Hijrah 1434.

Beliau berkata Islam tidak menggalakkan umatnya berpeluk tubuh dan hanya berdoa mengharapkan rezeki datang menggolek tanpa berusaha.

"Sesungguhnya ajaran Islam tidak pernah menyuruh umatnya menyerahkan segala-gala kepada takdir tanpa berusaha untuk memperbaiki diri dan mengorak langkah ke arah kesejahteraan hidup," katanya dalam perutusan Maal Hijrah 1434H yang disambut esok.

Muhyiddin berkata ajaran Islam juga menuntut umatnya supaya memelihara silaturrahim dan tidak melemparkan fitnah sesama sendiri atau melakukan tindakan yang akan melemahkan umat Islam.

"Justeru, marilah kita bersatu sebagai satu ummah dalam menghadapi segala cabaran dan rintangan," katanya.

Sambil mengucapkan Selamat Menyambut Awal Muharram 1434H kepada umat Islam, Muhyiddin berharap segala usaha yang dilaksanakan mereka mendapat keredaan Allah S.W.T dan Malaysia terus terpelihara.

Beliau berkata Awal Muharam merupakan pembuka kepada tahun hijrah yang membawa erti sangat besar kepada seluruh umat Islam di dunia.

Menurutnya keseluruhan perjuangan Rasulullah SAW adalah gabungan tindakan yang berasaskan kepada prinsip-prinsip Islam sejati dengan sentiasa berikhtiar, sabar dan tidak putus asa serta sentiasa berserah kepada Allah S.W.T.

Sambutan Maal Hijrah 1434 Peringkat Kebangsaan bertemakan 'Wasatiyyah Tonggak Kesatuan Ummah' akan diadakan di Pusat Konvensyen Antarabangsa Putrajaya.

-- BERNAMA

Copyright © 2012 BERNAMA

Source: <http://www.bernama.com/bernama/v6/bm/newsindex.php?id=709203>